

此以自覺察故。長養成就方便畢竟故。

第三分總標中。結前生後可知。一切大人。即目菩薩。以揀二乘。教雖在小。論取深意。例判大行。又據首標。建立菩薩所修行法。則一經始末。悉大人行。豈唯此分乎。孤山云。三乘聖人。悉曰大人者。誤也。即前所謂。大道心眾生。亦云大士。士即是人。譯語小異。安有小聖。反名大耶。八大人覺經云。如此八事。乃是諸佛菩薩大人之所覺悟。非唯此經。一切經論。凡標大人。皆為揀小。學者宜知。常用覺察。勤修習故。長養成就。不退失故。長養方便是因。即前七段成就。畢竟是果。即第八段。如第七段結文自見。

△^{丁二}隨釋八。^{戊一}無求功德。^{戊二}知覺功德。^{戊三}遠離功德。^{戊四}不疲倦功德。^{戊五}不忘念功德。^{戊六}禪定功德。^{戊七}智慧功德。^{戊八}畢竟功德。初中二。^{己一}舉經。^{己二}釋義。今初

經曰。汝等比丘。當知多欲之人。多求利故。苦惱亦多。少欲之人。無求無欲。則無此患。直爾少欲。尚宜修習。何況少欲能生諸功德。少欲之人。則無諂曲以求人意。亦復不為諸根所牽。行少欲者。心則坦然。無所憂畏。觸事有餘。常無不足。有少欲者。則有涅槃。是名少欲。

△^{己二}釋義二。^{庚一}總示。^{庚二}別釋。今初

論曰。是中第一。大人成就無求功德。知覺多欲過故。於中說所知覺。有五種相。初功德中。標云無求。是所修行。多欲即所覺過。但常照察。未必對過。下皆類此。

△^{唐二}別釋五。_{文如}

一者知覺障相。謂煩惱業苦。三種障故。如經。汝等比丘。當知多欲之人。多求利故。苦惱亦多。故。此示迴轉不息故。二者知覺治相。成就遠離三種妄想故。如經。少欲之人。無求無欲。則無此患故。三者知覺因果集起相。成就無量行故。如經。直爾少欲。尚宜修習。何況少欲能生諸功德故。四者知覺無諸障畢竟相。三障畢竟故。如經。少欲之人。則無諂曲以求人意。亦復不為諸根所牽故。五者知覺畢竟成就相。般若等三種功德。果成就故。如經。行少欲者。心則坦然。無所憂畏。觸事有餘。常無不足。有少欲者。則有涅槃。是名少欲故。

別釋中。初文。煩惱對多欲。業對多求。苦對苦惱。此三種障。展轉相續。故云迴轉不息。此即釋上三多字也。二中。三種妄想。即上三障。言遠離者。反上三多為三無故。患即是苦。三中因果集起者。出世因果。起自少欲。謂能生也。無量行者。即上因果。謂諸功德也。經云直爾等。舉獨況兼。顯勝申勸。四中。前文但云三無。此中的示所無之相。指出病根。故云畢竟相。

也。諂曲是煩惱。求人是業。諸根所牽是苦。五中顯示。少欲修成之益。故云畢竟成就相。般若等三。即解脫法身。三德之果。般若觀照。故坦然無畏。對上無諂也。解脫絕縛。故有餘常足。對上無求也。法身體寂。故究竟涅槃。對上不為諸根所牽也。坦謂平坦。不求自足。故無憂畏。觸事謂隨時。所須皆為過分。舊記·以心坦然·配法身者非。是名一句。結指上文。下皆例爾。

△^{戊二}知覺功德二。^{巳二}標章。^{巳二}舉經。^{巳三}釋義。

今初

復次說第二。大人知覺功德。

△^{巳二}舉經。

經曰。汝等比丘。若欲脫諸苦惱。當觀知足。知足之法。即是富樂安穩之處。知足之人。雖臥地上。猶為安樂。不知足者。雖處天堂。亦不稱意。不知足者。雖富而貧。知足之人。雖貧而富。不知足者。常為五欲所牽。為知足者之所憐愍。是名知足。

△^{巳三}釋義二。^{庚一}釋對治苦因果。^{庚二}釋三種差別。初中二。^{辛一}正釋。^{辛二}對簡。初中二。^{壬一}治苦因果。

^{壬二}成清淨因果。今初

論曰。第二。大人知覺功德者。成就知足行故。對治苦因果故。如經。汝等比丘。若欲脫諸苦惱。

當觀知足故。是中惱者。示現煩惱。過從苦生故。

第二功德。初治苦因果者。即經苦惱二字。苦即現果。惱謂當因。令觀知足。即是對治。是中下點示。言煩惱過。從苦生者。過即是業。此謂三道。展轉相生。惑業生苦。苦生惑業。三世因果。相續無窮也。

△^三成清淨因果。

復說清淨因果。成就治法故。如經。知足之法。即是富樂安穩之處故。

次科清淨因果。無貪故富。無惱故樂。即清淨因也。近脫三途。遠超二死。故得安穩處。即清淨果也。

△^辛對簡。

若如是者。二種知覺。云何差別。此中示現。初知覺者。遠離他境界事故。知足者。於自事中遠離故。

次對簡中。初徵起。少欲知足。二種相濫故。此下釋通。少欲於他物不求。知足於自事不縛。

雜心論云。少欲未來境。謂未得者。即他境界。知足現在境。謂已得者。即是自事。又云現在不取一錢難。未來捨輪王

位易。則知二行。前劣後優。昔人妄以他境界事。註當觀知足。以自事遠離。註安穩之處。今時講師。猶將傳授。能說所聽。冥然莫知。毀法誑人。不畏來報。悲夫。

△^庚釋三種差別二。^辛總示。^辛別釋。今初

復次有三種差別。示現知足不知足故。

次釋差別。總示中三種別者。即下處事法也。

△^辛別釋三。^{文如}

一者於何等。何等處。受用差別故。二者於何等。何等事。受用差別故。三者於何等。何等法中。無自利。有自他利差別故。如經。知足之人。雖臥地上。如是等。如經應知。

別釋中初何等處者。即經雖臥地上。猶為安樂。雖處天堂。亦不稱意故。二何等事者。即如經。雖富而貧。雖貧而富故。三何等法者。如經。常為五欲所牽。為他憐愍故。無自利者。為欲牽也。有自他利者。自既知足。憐愍於他故。文中一一雙牒何等者。示現差別義故。

△^戊遠離功德二。^己標意。^己舉經。^己釋義。今初

次說第三。大人遠離功德。